

Zämme Spaare

Vor zäh Joor hesch kenne - ohni lang sueche
e Flug uff d Kapverde im Internet bueche
e Fährthli ins Elsass primär mit em Diesel
do sait Dir kaine 'bisch Du au e Grysel'
bim Skifahre het s Schnee gä diräggt ab Kanone
Strom hets jo gnueg - und s duet sich au lohne
und uff em Kryzfahrtschiff, dr Queen Mary II
luegsch bi Popcorn sälle Film mit däm gfährliche Hai

Hesch d Wohnig gheizt, drby d Fänschter wyt offe
hit wurd me Dir sage 'hösch, bisch Du denn bsoffe?'
d Klimaalaag heersch dr ganz Daag motore
s Resultat: an d Ohre hesch firchterlig gfrore
Wasser het me gedangellos gnosse
bim Zehnputze isch es grad pauselos gflosse
s Fuudi het me als dreylaagig putzt
und s Papyr drby numme aisytig gnutzt

D Rohstoff gehn us und s Ärd-Eel wird knapp
dr Wasservorrot macht langsam au schlapp
Ärdgas wänn mir vom Putin au nimme
well är e Schofseggel syg - zimlig e schlimme
d Schwobe lehn sich uff e tief Niveau abe
und fehn wieder a noh Steinkohle grabe
d Amerikaner brilliere mit vyl Drägg am Stägge
und dien us em Schieferstei Gas usefracke

Das git Abhängigkaite wo nit sotte reize
willsch dass dr Bin Salman di Stube duet heize?
und Ärdbeebe gits vo däm grabe und bohre
irgendwann fliegt ys dä ganz Saich um d Ohre
Iberschwemmige gits und d Gletscher dien schmelze
d Holländer laufe gly numme uff Stelze
dr Ysbär sait zue synere Frau
'Ich ha nassi Fiess, y hau s jetzt denn, ciao!'

D Sommaruga meint ganz ungeniert
dass nur kain im Winter friert
sell me zämme in d Wanne sitze
d Noochbere konnte aim unterstizte
uss däm Sud, het si versproche
kasch e feyni Suppe koche
au dr Muurer wär gärn drby
nur nääbe eme Ääs wott är nit sy

Dr FCB het e Sparplan - ganz e klare
und foht scho aa bim Goolschiesse spaare
me het das bim FCZ usspioniert
wo scho länger Uffwand und Erfolg reduziert
dr Federer buechstabiirt sportlig au zrugg
het finanziell aber nit sone Drugg
em Ronaldo het s gfalle in Katar am Strand
drum schuttet är jetzt in Riad im Sand.
dr Iran spaart scho bi Menscherächt
so wird s ys vom verzichte schlächt

Fleisch und Bier kasch grad vergässe
bisch numme no am Wurze frässe
und au Hind darfsch nimm verspyyse
sunscht gits wieder sone Corona Kryse

Drum wänn mir ys vorstelle wie s kennti laufe
wenn alli numme no Teslas wurde kaufe
s rotiert dr Herr Daimler in synere Gruft
mir hätte kei Abgas me in unserer Luft
und bausch dr e Windrad dehaime uff dy Dach
egal ob s e steils isch oder au flach
no kochsch dr e Curry mit siess-suure Sprosse
usser bi Flaute, do blybt d Kuchi gschlosse

Gschlosseni Kreisläuf, das wär doch e Zyl
momentan bruchts aifach vo allem z vyl
drum schetze mir unseri Rohstoff, die rare
und nämme e Schnupf und dien zämme spaare!